

Kantona Sarajevo, uz pribavljeno mišljenje Ministarstva finansija Kantona Sarajevo i Sindikata, donosi

**PRAVILNIK  
O PLAĆAMA I NAKNADAMA DRŽAVNIH  
SLUŽBENIKA I NAMJEŠTENIKA MINISTARSTVA  
SAOBRAČAJA KANTONA SARAJEVO**

**I - OPĆE ODREDBE**

Član 1.

(Predmet)

Ovim pravilnikom utvrđuju se plaće i naknade državnih službenika i namještenika u Ministarstvu saobraćaja Kantona Sarajevo (u daljem tekstu: Ministarstvo), pravo na uvećanje plaće, pravo na naknadu, plaće za pripravnike i naknade za lica na stručnom osposobljavanju, način obračuna i isplate plaće, prestanak važenja ranijeg propisa i stupanje na snagu.

Član 2.

(Rodna ravnopravnost)

Izrazi koji su u ovom pravilniku radi preglednosti dati u jednom gramatičkom rodu bez diskriminacije se odnose i na muški i na ženski rod.

**II - PLAĆE DRŽAVNIH SLUŽBENIKA I  
NAMJEŠTENIKA**

Član 3.

(Pravo na plaću)

- (1) Državni službenik i namještenik u organu državne službe ima pravo na plaću koja odgovara radnom mjestu na koje je državni službenik, odnosno namještenik postavljen.
- (2) Plaća državnog službenika i namještenika utvrđuje se rješenjem koje donosi ministar saobraćaja Kantona Sarajevo (u daljem tekstu: ministar).

Član 4.

(Utvrdjivanje osnovice za obračun plaće)

Osnovica za obračun plaće državnog službenika i namještenika utvrđuje se prema članu 5. Zakona o plaćama i naknadama u organima vlasti Kantona Sarajevo ("Službene novine Kantona Sarajevo", br. 5/19 i 40/22) (u daljem tekstu: Zakon o plaćama i naknadama).

Član 5.

(Osnovna plaća)

Osnovna plaća državnog službenika i namještenika utvrđuje se množenjem osnovice za plaću iz člana 4. ovog pravilnika i boda za obračun plaće sa utvrđenim koeficijentom platnog razreda.

Član 6.

(Platni razredi i koeficijenti za državne službenike)

Radna mjesta državnih službenika Ministarstva razvrstavaju se u platne razrede, a za svaki platni razred utvrđuju se koeficijenti za obračun plaće, prema sljedećim vrijednostima:

Redni broj	Naziv radnog mjesta	Platni razred	Koeficijent
1.	sekretar Ministarstva	I	6,20
2.	pomoćnik ministra	II	5,70
3.	rukovodilac upravne organizacije u sastavu Ministarstva	IV	4,60
4.	rukovodilac unutrašnje organizacione jedinice	V	4,50
5.	stručni savjetnik	VII	4,10
6.	viši stručni saradnik	VIII	3,90
7.	stručni saradnik	IX	3,70

Član 7.

(Platni razredi i koeficijenti za namještenike)

Radna mjesta namještenika Ministarstva razvrstavaju se u platne razrede, a za svaki platni razred utvrđuju se koeficijenti za obračun plaće, prema sljedećim vrijednostima:

Redni broj	Naziv radnog mjesta	Platni razred	Koeficijent
1.	Viši referent (SSS i VKV radnik)	V	2,70

**POGLAVLJE III - UVEĆANJE OSNOVNE PLAĆE**

Član 8.

(Uvećanje osnovne plaće)

- (1) Osnovna plaća državnog službenika i namještenika uvećava se:
  - a) za prekovremeni rad 50%,
  - b) za rad noću 35%,
  - c) za rad u dane sedmičnog odmora 30%,
  - d) za rad u dane praznika koji su po zakonu državni praznici 50%.
- (2) Uvećanje plaće iz stava (1) ovog člana utvrđuje se rješenjem koje donosi ministar.
- (3) Uvećanja osnovne plaće iz stava (1) ovog člana se međusobno ne isključuju.
- (4) Ministar će na prijedlog neposrednog rukovodioca, donijeti rješenje kojim se osnovna plaća državnog službenika ili namještenika uvećava za procenat do 20%, za period u kome, pored poslova svog radnog mjesta, privremeno obavlja i poslove drugog radnog mjesta, pod uslovom da ima najmanje stručnu spremu radnog mjesta čije poslove obavlja.
- (5) Ministar je obavezan za svaki mjesec pojedinačno donijeti posebno rješenje državnom službeniku i namješteniku o privremenom obavljanju poslova drugog radnog mjesta.

Član 9.

(Uvećanje plaće po osnovu radnog učinka)

- (1) Elementi za utvrđivanje dijela plaće po osnovu radnog učinka državnih službenika i namještenika su ocjena rada i pripadajući procenat uvećanja osnovne plaće po osnovu ocjene rada.
- (2) Način ocjenjivanja rada državnih službenika i procenat uvećanja osnovne plaće po osnovu ocjene rada regulisat će se pravilnikom iz člana 41. stav (10) Zakona o državnoj službi u Kantonu Sarajevo ("Službene novine Kantona Sarajevo", br. 31/16 i 45/19) i kolektivnim ugovorom.
- (3) Procenat uvećanja plaće po osnovu ocjene rada iz stava (2) ovog člana shodno se primjenjuju i na ocjenu rada namještenika.

Član 10.

(Dio plaće po osnovu ocjene rada)

- (1) Dio plaće koji pripada državnom službeniku i namješteniku po osnovu ocjene rada utvrđuje se kako slijedi:
  - za ocjenu "izuzetno uspješan" / "naročito uspješan" 2% od osnovne plaće.
- (2) Procenat na ime ocjene rada iz stava (1) ovog člana pripada državnom službeniku i namješteniku na mjesečnom nivou do sljedećeg ocjenjivanja.

## Član 11.

(Uvećanje plaće po osnovu posebnih uslova rada i prirode posla)

- (1) Uvećanje plaće po osnovu posebnih uslova rada za višeg referenta za administrativne poslove na protokolu i arhiviranje iznosi 10% od osnovne plaće.
- (2) Uvećanje plaće iz stava (1) ovog člana obračunava se na osnovnu plaću bez dijela plaće po osnovu radnog staža i čini sastavni dio plaće.
- (3) Uvećanje plaće po osnovu posebnih uslova rada i uvećanje plaće iz člana 8. ovog pravilnika se međusobno ne isključuju.

## Član 12.

(Uvećanje plaće po osnovu minulog rada)

Osnovna plaća državnih službenika i namještenika uvećava se za 0,6% (minuli rad) za svaku započetu godinu staža osiguranja, s tim da ukupno povećanje ne može biti veće od 20%.

**POGLAVLJE IV - NAKNADE PLAĆE**

## Član 13.

(Naknada za ishranu tokom rada)

- (1) Državni službenik i namještenik ima pravo na novčanu naknadu za ishranu u toku rada (topli obrok), u visini 1% prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku.
- (2) Naknada iz stava (1) ovog člana neće se obračunavati za vrijeme odsutnosti s posla po osnovu službenog puta, bolovanja, porodiljskog odsustva, godišnjeg odmora, plaćenog ili neplaćenog dopusta.

## Član 14.

(Regres za godišnji odmor)

- (1) Državni službenik i namještenik ima pravo na naknadu na ime regresa za korištenje godišnjeg odmora u visini 50% prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku.
- (2) Pravo na regres iz stava (1) ovog člana ima svaki državni službenik i namještenik koji u toku tekuće kalendarske godine ima pravo na godišnji odmor.
- (3) Državni službenik i namještenik koji nije stekao pravo na puni godišnji odmor, za dane godišnjeg odmora po osnovu izvršenog mjeseca rada ima pravo na regres srazmjern broju dana godišnjeg odmora koje koristi u odnosu na 20 dana punog godišnjeg odmora.

## Član 15.

(Naknada za bolovanje)

- (1) Državni službenik i namještenik ima pravo na naknadu plaće za vrijeme privremene spriječenosti za rad (bolovanje) do 42 kalendarska dana u visini njegove neto plaće iz prethodnog mjeseca.
- (2) Naknada plaće za bolovanje preko 42 dana ostvaruje se prema propisu Federacije Bosne i Hercegovine kojim uređuje naknada za ovo bolovanje, s tim da razliku do pune plaće isplaćuje Ministarstvo.

## Član 16.

(Naknada za porodiljski dopust)

Državni službenik i namještenik, za vrijeme porodiljskog dopusta, ima pravo na naknadu plaće prema propisima Kantona Sarajevo kojim se uređuje ova oblast, prema mjestu uplate

doprinosu, s tim da razliku do visine pune plaće uplaćuje Ministarstvo.

## Član 17.

(Naknada za godišnji odmor)

Državni službenik i namještenik, za vrijeme godišnjeg odmora ima pravo na naknadu plaće u visini svoje neto plaće iz prethodnog mjeseca, u skladu kolektivnim ugovorom i ovim pravilnikom.

## Član 18.

(Naknada za službeno putovanje)

- (1) Državni službenik i namještenik, imaju pravo na naknadu za troškove službenog putovanja na području Federacije Bosne i Hercegovine, odnosno Bosne i Hercegovine, kao i za putovanje u inostranstvo na koje se upućuje na izvršenje službenog zadatka.
- (2) Visinu i način ostvarivanja naknade iz stava (1) ovog člana utvrđuje uredbom Vlada u skladu sa kolektivnim ugovorom.

## Član 19.

(Naknada za prijevoz na posao i s posla)

- (1) Državnom službeniku i namješteniku, kojem nije organizovan službeni prijevoz na posao i posla, a čije je mjesto stanovanja od mjesta rada udaljeno najmanje dva kilometra, pripada naknada za troškove prijevoza u visini mjesečne karte gradskog, prigradskog i međugradskog saobraćaja.
- (2) U međugradski saobraćaj spadaju mjesta koja su udaljena od mjesta rada do 70 kilometara.

## Član 20.

(Naknada za slučaj povrede na radu, teške bolesti i invalidnosti)

- (1) U slučaju povrede na radu, teške bolesti i invalidnosti državnog službenika ili namještenika ili člana njegove uže porodice isplaćuje se jednokratna novčana pomoć u visini tri prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.
- (2) Naknada iz stava (1) ovog člana isplaćuje se samo jednom po osnovu iste povrede, iste teške bolesti i istog invaliditeta.
- (3) Članom uže porodice u smislu stava (1) ovog člana smatraju se članovi uže porodice državnog službenika ili namještenika kako je regulisano u članu 21. stav (2) ovog pravilnika.

## Član 21.

(Naknada za slučaj smrti)

- (1) U slučaju smrti državnog službenika, odnosno namještenika, njegovoj porodici se isplaćuju troškovi sahrane u visini od četiri prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.
- (2) Članom uže porodice državnog službenika ili namještenika u smislu stava (1) ovog člana smatraju se bračni i vanbračni drug ako žive u zajedničkom domaćinstvu, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina, odnosno 26 godina starosti, ako se nalaze na redovnom školovanju i nisu u radnom odnosu, a djeca nesposobna za rad bez obzira na starosnu dob), roditelji (otac, majka, očuh, maćeha i usvojitelji), braća i sestre bez roditelja do 18 godina, odnosno 26 godina starosti, ako se nalaze na redovnom školovanju i nemaju drugih prihoda

već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad pod uvjetom da s njima živi u zajedničkom domaćinstvu bez obzira na starosnu dob i unučad ako nemaju roditelja i žive u zajedničkom domaćinstvu s državnim službenikom ili namještenikom.

- (3) Naknada iz stava (1) ovog člana isplaćuje se i u slučaju smrti člana uže porodice državnog službenika ili namještenika.
- (4) Ukoliko u organu državne službe istog nivoa vlasti rade dva ili više članova uže porodice, troškovi sahrane iz stava (1) ovog člana se isplaćuju samo jednom zaposlenom članu uže porodice.

#### Član 22.

(Pravo na osiguranje od posljedica nesretnog slučaja)

- (1) Državni službenik i namještenik ima pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa u Ministarstvu.
- (2) Visina osiguranja po ovoj osnovi određuje se prema polici osiguranja od posljedica nesretnog slučaja odnosno polici osiguranja od prirodne smrti.
- (3) Ugovor o osiguranju sa odgovarajućom osiguravajućom kućom zaključuje ministar za sve državne službenike i namještenike zaposlene u Ministarstvu.

#### Član 23.

(Otpremnina)

- (1) Državni službenik i namještenik ima pravo na otpremninu prilikom odlasku u penziju u visini svojih pet ostvarenih prosječnih neto plaća isplaćenih u prethodnih pet mjeseci, bez obzira da li odlazi u starosnu, invalidsku ili prijevremenu penziju, u skladu sa zakonom.
- (2) Otpremnina se isplaćuje uz isplatu zadnje pripadajuće plaće.

#### Član 24.

(Naknada u slučaju prekobrojnosti)

- (1) U slučaju prestanka radnog odnosa državnog službenika, odnosno namještenika zbog prekobrojnosti, taj državni službenik, odnosno namještenik ima pravo na naknadu u iznosu i to:
  - (1) za radni staž do 10 godina naknada iznosi tri neto plaće državnog službenika, odnosno namještenika,
  - (2) za radni staž od 11 godina do 30 godina naknada iznosi šest neto plaća državnog službenika, odnosno namještenika,
  - (3) za radni staž preko 30 godina naknada iznosi deset neto plaća državnog službenika, odnosno namještenika.
- (2) Pod neto plaćom iz stava (1) ovog člana, podrazumijeva se plaća koju je državni službenik i namještenik ostvario u posljednjem mjesecu prije proglašenja prekobrojnim.
- (3) Naknada isplaćuje posljednjeg dana rada u Ministarstvu.

#### Član 25.

(Naknada roditelju djeteta sa težim smetnjama u razvoju)

- (1) Roditelju djeteta sa težim smetnjama u razvoju (teže hendikepiranog djeteta), koji radi polovinu radnog vremena, u slučaju da se radi o samohranom roditelju ili da su oba roditelja zaposlena, pod uvjetom da dijete nije smješteno u ustanovu socijalno-zdravstvenog zbrinjavanja, na osnovu nalaza nadležne zdravstvene ustanove, pripada pravo na naknadu plaće do visine

njegove pune plaće, dok ovo pravo na naknadu ne bude regulisano posebnim zakonom.

- (2) Naknada iz stava (1) ovog člana pripada jednom od usvojlaca djeteta ili licu kojem na osnovu rješenja nadležnog organa dijete povjereno na čuvanje i odgoj.

#### Član 26.

(Naknada plaće za vrijeme rada sa polovinom punog radnog vremena žene sa djetetom najmanje do jedne godine života i žene koja ima blizance, treće i svako sljedeće dijete)

- (1) Nakon isteka porođajnog odsustva, ženi sa djetetom najmanje do jedne godine života, koja radi polovinu punog radnog vremena i ženi koja ima blizance, treće i svako sljedeće dijete, i koja ima pravo da radi polovinu punog radnog vremena do navršene dvije godine života djeteta, pripada pravo na punu plaću.
- (2) Pravo iz stava (1) ovog člana može koristiti i državni službenik i namještenik-otac djeteta, ako žena za to vrijeme radi u punom radnom vremenu.
- (3) Ukoliko lice koje ostvaruje pravo iz ovog člana ostvaruje i dio naknade po istom osnovu, a iz drugih izvora, poslodavac će isplaćivati razliku naknade do visine punog iznosa plaće.

#### Član 27.

(Naknada za rad u komisijama)

- (1) Članovi komisija koje se formiraju na osnovu rješenja Vlade Kantona Sarajevo, odnosno ministra, kada poslove člana komisije obavljaju izvan radnog vremena, imaju pravo na maksimalnu mjesečnu naknadu za rad u komisijama do visine jedne i pol (1.5) osnovice iz člana 5. Zakona o plaćama i naknadama.
- (2) Odlukom Vlade Kantona Sarajevo reguliše se način i uslovi obrazovanja komisija i način ostvarivanja naknade, a tačan iznos odnosno visinu naknade za rad svojim aktom utvrđuje Vlada Kantona, odnosno ministar, za svaku pojedinačnu komisiju.
- (3) Naknade za rad u komisijama iz stava (1) ovog člana, a koje finansiraju od uplata fizičkih ili pravnih lica, ne ulaze u ograničenja iz stava (1) ovog člana.

### POGLAVLJE V - PRIPRAVNICI I LICA NA STRUČNOM OSPOSOBLJAVANJU

#### Član 28.

(Plaća za pripravnike)

- (1) Plaća pripravnika visoke, više i srednje stručne spreme u Ministarstvu utvrđuje se u iznosu i to:
  - a) za visoku školsku spremu u iznosu 80% od osnovne plaće utvrđene za radno mjesto stručnog saradnika,
  - b) za višu školsku spremu u iznosu 80% od osnovne plaće utvrđene za radno mjesto samostalnog referenta,
  - c) za srednju stručnu spremu u iznosu 80% od osnovne plaće utvrđene za radno mjesto referenta.
- (2) Osnovna plaća iz stava (1) ovog člana predstavlja iznos plaće bez dijela plaće po osnovu penzijskog staža.

#### Član 29.

(Visina naknade za lica na stručnom osposobljavanju bez zasnivanja radnog odnosa)

- (1) Lica na stručnom osposobljavanju bez zasnivanja radnog odnosa visoke, više i srednje stručne spreme u Ministarstvu imaju pravo na naknadu, i to:
  - a) za visoku školsku spremu u iznosu 35% od osnovne plaće stručnog saradnika,

- b) za višu školsku spremu u iznosu 35% od osnovne plaće samostalnog referenta,
  - c) za srednju stručnu spremu u iznosu 35% od osnovne plaće referenta.
- (2) Visina naknade iz stava (1) ovog člana određuje se od osnovne plaće odgovarajuće školske spreme.

## VI - OBRAČUN I ISPLATA PLAĆE

### Član 30.

(Obračun i isplata plaće)

- (1) Plaća se obračunava za jedan mjesec unatrag, a isplaćuje se za prethodni mjesec i od jedne do druge isplate plaće ne može proći više od 30 dana.
- (2) Plaća iz stava (1) ovog člana utvrđuje se rješenjem koje donosi ministar, a sadrži: lične podatke državnog službenika i namještenika, radno mjesto na koje je postavljen, platni razred i sve elemente koji su uzeti u obzir za utvrđivanje visine plaće.
- (3) Podaci o plaćama državnih službenika i namještenika su javni.
- (4) Sve izmjene u visini plaće vrše se rješenjem koje donosi ministar.

## POGLAVLJE VII - PRELAZNE I ZAVRŠNE ODREDBE

### Član 31.

(Prestanak važenja ranijeg propisa)

Stupanjem na snagu ovog pravilnika, prestaje da važi Pravilnik o plaćama i naknadama državnih službenika i namještenika Ministarstva saobraćaja Kantona Sarajevo broj 04-05-27058/19 od 09.08.2019. godine.

### Član 32.

(Stupanje na snagu)

Ovaj pravilnik stupa na narednog dana od dana objavljivanja u "Službenim novinama Kantona Sarajevo".

Broj 04-11-6992/23

17. marta 2023. godine  
Sarajevo

Ministar  
**Adnan Šteta, s. r.**

## Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo

Na osnovu člana 66. stav 2. Zakona o organizaciji organa uprave u FBiH ("Službene novine Kantona Sarajevo", broj 35/05), člana 4., stav 15. i 20. Zakona o komunalnim djelatnostima ("Službene novine Kantona Sarajevo", broj 14/16; 43/16; 10/17 i 19/17) i odredaba Uredbe o održavanju javne rasvjete ("Službene novine Kantona Sarajevo", broj 22/16), ministar komunalne privrede, infrastrukture, prostornog uređenja, građenja i zaštite okoliša donosi

### IZMJENE I DOPUNE

## PRAVILNIKA O TEHNIČKIM USLOVIMA SISTEMA JAVNE RASVJETE KANTONA SARAJEVO

### Član 1.

U Pravilniku o tehničkim uslovima sistema javne rasvjete Kantona Sarajevo ("Službene novine Kantona Sarajevo", broj 23/20), (u daljem tekstu: Pravilnik) u članu 2. stav 1) dodaju se riječi: "tehničke listove za korištenje instalacija javne rasvjete za priključenje samostojećih osvijetljenih reklamnih panoa"

### Član 2.

U članu 3. stav 1) Pravilnika dodaju se tačke: q) Isticanje putokaza za pravna lica - putokazi sa istaknutim nazivom

pravnih lica, u) ovlašteno tehničko lice Ministarstva - državni službenik Ministarstva sa kompetencijama iz elektroenergetike, v) samostojeći svjetleći reklamni pano (tkz. "bilbordi") - konstrukcija sa rasvjetom, čija je svrha reklamiranje raznih vrsta proizvoda i usluga i tačka w) komunalna naknada za korištenje instalacija javne rasvjete - naknada za korištenje instalacija javne rasvjete. U tački s) ee) investitor - dodaju se riječi Kanton, Grad i općine i pravna lica koja vrše izgradnju nove javne rasvjete.

### Član 3.

Ispod člana 23. Pravilnika dodaje se poglavlje sa dva člana kako slijedi:

## POGLAVLJE XIII. KORIŠTENJE INFRASTRUKTURE JAVNE RASVJETE ZA PRIKLJUČENJE SAMOSTOJEĆIH SVJETLEĆIH REKLAMNIH PANOVA

### Član 24.

(Tehnički uslovi za korištenje instalacija javne rasvjete za priključenje samostojećih svjetlećih reklamnih panoa)

- (1) Vlasnici samostojećih reklamnih panoa uz zahtjev za priključenje na instalaciju javne rasvjete uz dokumente propisane članom 19. i članom 20. Uredbe o upravljanju sistemom javne rasvjete Kantona Sarajevo dostavljaju i slijedeću tehničku dokumentaciju u formi Elaborata-tehničkog rješenja za priključenje.
- (2) Elaborat-tehničko rješenja za priključenje treba da sadrži:
  - skicu samostojećeg reklamnog panoa sa dimenzijama, brojem i vrstom rasvjetnih tijela i sa tehničkim karakteristikama rasvjetnih tijela i certifikatima rasvjetnih tijela,
  - statički proračun postavljenih rasvjetnih tijela na samostojećem reklamnom panou,
  - broj RM najbližeg stuba javne rasvjete na koji će se izvršiti priključenje,
  - popis svih tehničkih zahtjeva iz suglasnosti na lokaciju objekta i trasu priključenja od JP Elektroprivreda BiH d.d. - Podružnica Elektrodistribucija Sarajevo (nadležni operator distributivnog sistema) i način njihovog ispunjenja.
- (3) Nakon priključenja od Izvođača održavanja javne rasvjete dostavljaju se atesti ovlaštene institucije za urađene instalacije priključenja.

### Član 25.

(Uslovi priključenja na instalacije javne rasvjete za priključenje samostojećih svjetlećih reklamnih panoa)

- (1) Priključenje na instalacije javne rasvjete za priključenje samostojećih svjetlećih reklamnih panoa vrši ovlaštenu izvođač održavanja javne rasvjete.
- (2) Nakon priključenja ovlaštena organizacija vrši atestiranje instalacija.
- (3) Troškove priključenja i atestiranja snose vlasnici samostojećih svjetlećih reklamnih panoa.

### Član 4.

Ove izmjene i dopune Pravilnika stupaju na snagu danom objavljivanja u "Službenim novinama Kantona Sarajevo".

Broj 05-02-44841/22

02. februara 2023. godine  
Sarajevo

Ministar  
**Enver Hadžiahmetović, s. r.**